


太上感應篇



252  
4150

印造經像之十大利益

- (一) 從前所作種種罪過。輕者立即消滅。重者亦得轉輕。
  - (二) 常得吉神擁護。一切瘟疫水火寇盜刀兵牢獄之災。悉皆不受。
  - (三) 夙生怨對。咸蒙法益。而得解脫。永免尋讐報復之苦。
  - (四) 夜叉惡鬼。不能侵犯。毒蛇餓虎。不能爲害。
  - (五) 心得安慰。日無險事。夜無惡夢。顏色光澤。氣力充盛。所作吉利。
  - (六) 至心奉法。雖無希求。自然衣食豐足。家庭和睦。福壽綿長。
  - (七) 所言所行人。天歡喜。任到何方。常爲多衆。傾誠愛戴。恭敬禮拜。
  - (八) 愚者轉智。病者轉健。困者轉亨。爲婦女者。報謝之日。捷轉男身。
  - (九) 永離惡道。受生善道。相貌端正。天資超越。福祿殊勝。
  - (十) 能爲一切衆生。種植善根。以衆生心。作大福田。獲無量勝果。所生之處。常得見佛聞法。直至三慧宏開。六通親證。速得成佛。
- 印造經像。既有如此殊勝功德。故凡遇●祝壽●賀喜●免災

THE AUSTRALIAN NATIONAL  
ORIENTAL  
COLLECTION

太上感應篇

明義章第一

此章首明禍福之義乃全篇之綱領

太上曰。禍福無門。惟人自召。善惡之報。如影隨

形。

示警章第二

此章先言惡報以示警戒

是以天地有司過之神。依人所犯輕重。以奪人算。算減則貧耗。多逢憂患。人皆惡之。刑禍隨之。

6447





吉慶避之。惡星災之。算盡則死。

鑒察章第二

此章極言上天糾察之嚴

又有三台北斗神君。在人頭上。錄人罪惡。奪其紀算。又有三尸神在人身中。每到庚申日。輒上詣天曹。言人罪過。月晦之日。竈神亦然。凡人有過。大則奪紀。小則奪算。其過大小有數百事。欲求長生者。先須避之。

積善章第四

此章備舉爲善之端使人知所奮勵

是道則進。非道則退。不履邪徑。不欺暗室。積德累功。慈心於物。忠孝友悌。正己化人。矜孤恤寡。敬老懷幼。昆蟲草木。猶不可傷。宜憫人之凶。樂人之善。濟人之急。救人之危。見人之得。如己之得。見人之失。如己之失。不彰人短。不衒己長。遏惡揚善。推多取少。受辱不怨。受寵若驚。施恩不

求報。與人不追悔。

善報章第五

此章備舉善報使人知所向慕

所謂善人。人皆敬之。天道祐之。福祿隨之。衆邪遠之。神靈衛之。所作必成。神仙可冀。欲求天仙者。當立一千三百善。欲求地仙者。當立三百善。

諸惡章第六

此章備舉惡行使人知所儆戒

苟或非義而動。背理而行。以惡爲能。忍作殘害。

陰賊良善。暗侮君親。慢其先生。叛其所事。誑諸無識。謗諸同學。虛誣詐僞。攻訐宗親。剛強不仁。狠戾自用。是非不當。向背乖宜。虐下取功。諂上希旨。受恩不感。忿怨不休。輕蔑天民。擾亂國政。賞及非義。刑及無辜。殺人取財。傾人取位。誅降戮服。貶正排賢。凌孤逼寡。棄法受賂。以直爲曲。以曲爲直。入輕爲重。見殺加怒。知過不改。知善



不爲。自罪引他。壅塞方術。訛謗聖賢。侵凌道德。射飛逐走。發螫驚棲。填穴覆巢。傷胎破卵。願人有失。毀人成功。危人自安。滅人自益。以惡易好。以私廢公。竊人之能。蔽人之善。形人之醜。訐人之私。耗人貨財。離人骨肉。侵人所愛。助人爲非。逞志作威。辱人求勝。敗人苗稼。破人婚姻。苟富而驕。苟免無恥。認恩推過。嫁禍賣惡。沽買虛譽。

包貯險心。挫人所長。護己所短。乘威迫脅。縱暴殺傷。無故剪裁。非禮烹宰。散棄五穀。勞擾衆生。破人之家。取其財寶。決水放火。以害民居。紊亂規模。以敗人功。損人器物。以窮人用。見他榮貴。願他流貶。見他富有。願他破散。見他色美。起心私之。負他貨財。願他身死。干求不遂。便生咒恨。見他失便。便說他過。見他體相不具。而笑之。見

他才能可稱而抑之。埋盡厭人。用藥殺樹。恚怒師傅。抵觸父兄。強取強求。好侵好奪。擄掠致富。巧詐求遷。賞罰不平。逸樂過節。苛虐其下。恐嚇於他。怨天尤人。呵風罵雨。鬪合爭訟。妄逐朋黨。用妻妾語。違父母訓。得新忘故。口是心非。貪冒於財。欺罔其上。造作惡語。讒毀平人。毀人稱直。罵神稱正。棄順效逆。背親向疏。指天地以證鄙。

懷引神明而鑑猥事。施與後悔。假借不還。分外營求。力上施設。淫慾過度。心毒貌慈。穢食餒人。左道惑衆。短尺狹度。輕秤小升。以僞雜真。採取姦利。壓良爲賤。謾罵愚人。貪婪無厭。咒詛求直。嗜酒悖亂。骨肉忿爭。男不忠良。女不柔順。不和其室。不敬其夫。每好矜誇。常行妒忌。無行於妻子。失禮於舅姑。輕慢先靈。違逆上命。作爲無益。



感應篇

懷挾外心。自咒咒他。偏憎偏愛。越井越竈。跳食  
跳人。損子墮胎。行多隱僻。晦臘歌舞。朔旦號怒。  
對北涕唾及溺。對竈吟詠及哭。又以竈火燒香。  
穢柴作食。夜起裸露。八節行刑。唾流星。指虹蜺。  
輒指三光。久視日月。春月燎獵。對北惡罵。無故  
殺龜打蛇。

惡報章第七

感應之理已詳於前此復三致丁寧者蓋人惟貪曠易犯故重言以示戒

如是等罪。司命隨其輕重。奪其紀算。算盡則死。  
死有餘責。乃殃及子孫。又諸橫取人財者。乃計  
其妻子家口以當之。漸至死喪。若不死喪。則有  
水火盜賊。遺忘器物。疾病口舌諸事。以當妄取  
之直。又枉殺人者。是易刀兵而相殺也。取非義  
之財者。譬如漏脯救飢。鳩酒止渴。非不暫飽。死  
亦及之。



指微章第八

此章言心動即有神知欲人謹之於微以明如影隨形之義也

夫心起於善，善雖未為，而吉神已隨之。或心起於惡，惡雖未為，而凶神已隨之。

悔過章第九

此章言能改悔即可挽回天心

其有曾行惡事，後自改悔，諸惡莫作，衆善奉行，久久必獲吉慶，所謂轉禍為福也。

力行章第十

此章正言總結善惡之報，勉人以力行也

故吉人語善，視善，行善。一日有三善，三年天必降之福。凶人語惡，視惡，行惡。一日有三惡，三年天必降之禍。胡不勉而行之。

按晉書慕容皝載記。皝雅好文籍，勤於講授。學徒甚盛。至于千餘人。親造太上章，以代急就。攷隋志急就章。漢志作急就篇。顏氏家訓書說篇所引之小學章。隋志作小學篇。知古人章篇二字，皆可通用。太上章即

太上篇也。後人又增入感應二字。故名太上感應篇。雖不見於隋唐二志。然至宋史藝文志。已著錄矣。宋理宗紹定六年。賜錢百萬。命鄭清之印太上感應篇。由是始大行於世。是書之遠有端緒如此。

太上感應篇終

感應篇靈異記

一 總論

潘子璜曰。感應篇自晉以來。依此修身。成眞者多人。富貴者已不計其數矣。普天下街衢里巷。無不傳布。但千萬人中。求其深信力行者。未得一二。如有信而行之者。行之一年。天即賜之衣祿。行之二年。轉禍爲福。行之三年。不上進者。上進。行之五年。短命改爲長齡。行之十五



年萬事如意。行之三十年。身證仙果。余自巡撫山東以來。所化五十三人。遵行是篇。不是大富。即是大貴。甚至啞疾行之能開聲。惡疾行之能痊愈。報應釐然。但遵行之人。須要一心。且先從父子兄弟夫婦朋友上著力。更須廣布勸世。報應始捷。歷驗不爽。願共勉焉。

東越海門周汝登。少遊龍溪先生之門。雖常侍講席。而實無得也。後偶閱感應篇。竭力奉行。復著輯略。梓以勸

世。一旦心地開朗。洞明聖道。爲明季大儒。今儒學聖道。學仙釋學佛。有終身不能了悟。半途而廢者。蓋其根器既劣。復無功德及人耳。張紫陽云。若非積行修陰德。動有羣魔作障緣。有志於道者。當奉行是篇。爲上達資本云。

錢塘汪靜虛。見感應篇注證明顯。欲刻板廣施。以薄宦未果。其子汪源。謹遵先志。於洪武乙亥年。捐產刻成。多

方勸募。各出資財。印施萬部。曰。以此資先父冥福。更願母壽而康。兼祈子嗣。方刊首卷。妻已有娠。一日夢父謂曰。汝不但善成我志。且勸化共施。我已超生天堂。汝母亦增高壽。汝與衆善士俱已注名善籍矣。後母享遐齡。且得令嗣。源常曰。一念之誠。所求即得。感應之理。彰彰不爽。

蘇州潘芝軒。世恩之祖。奉行感應篇。爲善不倦。每歲暮。

自中旬後。即取白金二三百兩。各稱小包。三五兩不等。身披舊褐衣。各鄉鎮行走。察其無計度歲者。量給與之。人不知其爲誰也。終身不倦。後二子均顯達。

松江張德甫。每日虔誦感應篇。身體力行。生二子。田八百餘畝。年老分析。各授感應篇一帙。戒曰。爲人之道。盡在於是。卽作家之法。亦不外是。汝曹當如我力行之。二子問曰。篇中豈有作家法乎。父曰。算減則貧耗。蓋言人



所以貧也。福祿隨之。蓋言人所以富也。此即作家法也。後二子奉持如父命。事母孝。置產三千餘頃。富甲一郡。

二 延年之靈異

休寧方時可。自幼家貧多疾。後訪元門求度世術。至齊雲巖。遇異人謂曰。觀汝形貌。貧且無子。壽不滿三十六。欲求清福。須先種善根。時可歸。勉力刻感應篇施送。纔刻十章。而疾已減半。刻完而諸疾頓愈。家亦漸饒。生二

子。皆貴顯。竟以壽終。

朱斐玉。平日持誦感應篇甚虔。康熙戊申孟秋三日。患病幾絕。恍惚見一神謂曰。爾信誦感應篇。亦能奉行篇中數事。應錫爾壽。遂愈。

三 愈疾之靈異

仁和江端本。諱建本。父病篤。端本日夕叩禱。願刻感應篇萬卷。並減年以益親算。父夢祖語之曰。兒孫有善願。

可無慮也。遂愈。

明末海寧臨安一帶。沿家病瘡。陸麗京、柴省軒、二公同寓范氏。皆不染。一時爭書二公名於戶上。以鎮邪鬼。二公止之。令各供感應篇一冊於中堂。而瘡遂絕。其應驗之神速如此。

錢塘樊釗。字纘成。於雍正癸丑七月五日。染患時症。口眼歪斜。凡二十天。醫藥莫治。舉家惶惶。纘兄鼎九奉母

陳氏。齋沐叩禱。許印感應篇百部。纘成即於是夜神氣清爽。飲食漸進。不數日還原。

#### 四 禦災患之靈異

陳錦衣碧松者。居武林北郊。素濟人利物。爲德甚廣。尤虔奉感應篇。鳩工精刻。流通海宇。會積雨連月。遠行宿他所。夫人篝燈久候。未就寢。忽聞大聲擊門。時巨盜連劫里中。家戶戒嚴。驚謂盜至。亟呼家人同竄。甫出戶而



高牆忽崩。傾壓寢室。牀帳器皿。碎爲齏粉。一婢行稍遲。墮磚尙擊其踵。向使公不他出。夫人必不久候。一家數口。寧有一倖免哉。天佑善人。巧於示異如此。杭州官巷口。居民楊震之。奉感應篇甚虔。并刻板印施。康熙丁卯十月二十八日。火發。所居前後左右俱焚。惟楊屋家藏感應篇板。安然無恙。

五 得子之靈異

徽州吳大祈。少失怙恃。長復無子。多方請禱不效。客遺以感應篇曰。此生子獲福之本也。拜而受之。發心奉持。遷善改惡。未幾生三子。益信感應篇之靈。因於天啟丁卯。梓行以紀其事。

山東濟寧州貢生陳瑤妻沈氏。每懷孕至六七月。卽血崩幾死。沈聞感應篇靈異。矢願力行善事數十條。年後連舉二子。毫無病苦。

乾隆乙未。姑蘇徐天秩。印施感應篇三千卷。乞亡男再投爲子。後果驗。

## 六 得功名之靈異

福建漳州顏公茂猷。字光衷。號宗璧。生平奉行感應篇。隱德不可筆記。更以造萬世太平爲念。乃著迪吉錄。編以一心普度兆世太平。凡八卷。挑剔危微。助天闡教。讀其書而悔過遷善。學道成眞者。不知幾千萬人也。崇禎

甲戌會試。作五經題。主考官驚其才。疑違式。放榜後奏於朝。上大喜。特賜進士。列鼎甲前。共稱爲天子門生。一道人聞之曰。此陰鷲進士也。

尙士英。家貧好善。見人募刻是篇。欲捐無力。乃典衣以助之。冬著單服不悔。年逾三十。貧益甚。至京作寫館計。僑寓關帝廟。半載。渺無知者。因代寫對聯摺扇以資餬口。時近除夕。有重臣命其掌事。至關帝廟辦公。掌事見



士英所書。愛之。聘爲西席。上元日。重臣於花園徧懸花燈匾聯。請駕游玩。門客所書。多不當意。掌事以士英薦立命面試。士英字畫端妍。詞語雅切。大加欣賞。是夕駕臨園中。問何人手筆。重臣對曰。此臣家西席尙士英寫作。次早即召見於偏殿。試稱旨。欽賜進士。爲翰林院檢討。不數年。陞掌院學士。凡駕臨幸之處。士英載筆相從。遇合之隆。無有比者。後備盛禮。至關帝廟酬謝。道士設

錦箋繡墊。俟其歇息。禮畢稍憩。恍惚見關帝曰。爾今日之榮。乃助刻感應篇之力也。士英醒。方知獲報。遍以勸人。多有化者。

### 七 得富之靈異

程致中與弟致和。貿易於奉天省瀋陽。虧折不能回鄉。代人寫賬度日。一日致和在關帝朝。見壁上粘感應篇。載有報應事實。讀而信之。遂叩神發願持誦。以求得富。

感應篇  
每日晝則虔誠禮誦。夜則擁衾默誦。未幾。遇異人。教以傭工銀十兩。買某處一馬。獻俺答。獲賞銀五百兩。又教以此銀買大黃。獲利十倍。凡置貨。俱先期指點。獲貲無算。遂作歸計。異人曰。以君虔奉感應篇。故相助成富。嗣後宜益加勉勵。兄弟叩謝。歸成富室。刻感應篇萬部勸世。

### 八 成仙之靈異

萬德聚。祖遺太上感應篇一卷。供奉中堂。身體力行。其妻及兒女。亦皆互相勸勉。一舉一動。悉遵理法。一日。有道士造謁。德聚叩問玄門妙旨。道士曰。心卽是道。道卽是心。心與道離。卽墮惡趣。心與道合。卽出苦輪。地獄天堂。祇爭此一念耳。若夫產嬰結胎之法。無論萬不能求。即使火候將完。必有物焉以敗之。終於無成。吾觀尊府祥光盤結。未知藏有何寶。德聚曰。貧家安有寶也。道士



尋至中堂。見所感應篇。曰：此卽至寶也。三教聖賢。撰造經文。示人以修行之路。人能依經而行。則心之精誠。發爲英華。經文必字字現寶光。若徒事諷誦。以希福報。則私意掩蓋。經文必黯淡無色。今觀子家感應篇。瑞靄直達霄漢。是子之心。允符太上之心。大丹成矣。殊爲可賀。但天爵雖可預期。而人事尤宜加謹。子其勉之。勿墮前功可也。德聚遵道士教。修持益力。三十年濟人利物。

無善不行。果有天官捧誥。仙樂來迎。後共見德聚携妻。子白日上昇。卽於其家立像祀之。每遇水旱。祈禱輒應。

九 其他種種靈異

彭蘭臺篤信是篇。以古來注釋者多雜引小說及里巷傳聞以爲之證。婦孺閱之。莫不形惕心愴。而學士大夫。反有以文不雅馴。鄙薄不屑視。因取史傳中善惡果報之最著者。編成二卷。名曰二十二史感應錄。其子詠莪。

重編勸世。詠我官至宰相。

史玉涵。篤信是篇。輯感應類鈔。刊印萬部勸世。子孫賢達。

聶仲芳。篤信是篇。爲觀察時。以黃泰一所著感應篇圖說最善。捐廉購其板藏上海。廣爲流傳。又序史玉涵所輯感應類鈔。刊以勸世。旋領封圻。後裔亦甚賢達。

唐步瀛。篤信是篇。嘗曰。余近十餘年來。崇奉感應篇。藉

圖晚蓋。並刊印多部勸世。因之處境較順。大病忽愈。奇險忽平。且有被人傾陷而轉禍爲福事。益信禍福自求之說。古人不我欺也。

淨意居士曰。觀感應篇靈異記。如影隨形。而所以致此靈異者有三。曰誦（古德曰。誦時要一字一頓。看時要句句與自心相對照。）曰行（奉行感應篇。其要在持敬集義。丹書曰。敬勝怠者吉。義勝欲者從。易



252  
4150

卷一

曰敬以直內。義以方外。朱子曰。學問根本。在持敬集義。工夫在念念省察。養真子曰。人當無事時。心要常在腔子裏。不可暗中妄想。有事時。心要專在理上。不可強從己見。此即持敬集義之法也。曰傳而已。三者之中。惟力行最重。而得報又以印傳為最速。蓋一人行善。不如人人行善也。一人獲福。不如人人獲福也。佛言以法作施。功德無量。信然。

# ◀ 印 翻 迎 歡 ▶

(篇 應 感 上 太)

◀ 元八十二洋料工計本千每 ▶

● 分四洋大本每通流星另 ●

◀ 行印局書善經佛院經刻央中 ▶

## 中央刻經院啓事

院址 北平宣外大街北頭

本院刷印各種佛經及勸善書籍以求挽回風俗糾正人心自成立以來已出書籍二百八十餘種凡二百七十八萬本風行全國久為閱者所稱道此外並代流通各省刻經處之佛經以弘法化如蒙 賜顧不勝歡迎另印有詳細書目贈閱函索即寄

